

Noticia
Transparente
di Gobierno

ISLA ONLINE

Diabierna 19 Juli 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



PROME MINISTER

Evelyn Wever-Croes

Aña escolar 2023/2024 tawata un aña cu retonan pero tambe cu logronan importante

PROME MINISTER TA GRADICI DOCENTE Y MAESTRONAN Y TUR CU TA CONTRIBUI NA UN MANERA OF OTRO CU ENSEÑANSA

Bon temporada di Vakantie na nos muchanan y un exitoso aña escolar 2024/2025

Ya ta un siman cu nos muchanan ta gosando di vakantie bon mereci despues di un aña escolar yen di siñamento duro, crecemento como tambe cu hopi reto y trabou duro. Nos muchanan na scolnan rond Aruba sigur a muestra dedicacion remarcabel den nan estudio mirando e bon resultadonan. Apesar cu tin muchanan cu mester ripiti klas, nos tur mester ta orguyoso cu cada esfuerzo, dedicacion y logro ta fortalece e fundeshi pa un futuro mas briyante.

“Aña escolar a yega su final siman pasa, y ya hopi ta esnan cu ta disfrutando di un dushi vakantie. Aña escolar 2023/2024 tawata un aña cu retonan pero tambe cu logronan importante. Por mira atras na un aña escolar hopi exitoso”, Prome Minister Evelyn Wever-Croes a remarca.

Mientras nos muchanan ta disfruta di un dushi vacante bon mereci, Prome Minister a tuma e oportunidad pa extende su gratitud na tur esnan cu ta traha riba tereno di enseñansa. Tur docente, maestro, esnan cu ta sostene e scolnan administrativamente, esnan den area di mantencion y limpieza y tur cu ta contribui na un manera of otro cu enseñansa. “Boso dedicaion, trabou duru y compromiso pa cuida nos mucha y hobennan ta hopi aprecia. Boso ta forma e futuro di nos nacion”, Prome Minister a enfatisa.

Prome Minister ta desea e studentenan cu a gradua y ta bay studia den exterior hopi exito. Su conseho pa nan ta pa nan keda enfoca riba nan metanan pa nan logra. “Y corda cu unda boso bay boso ta un embahador di Aruba, y nos ta confia cu boso lo representa nos pais dignamente. Pronto boso lo ta bek na boso dushi isla pa yuda cu e desaroyo di Aruba”.

Palabranan di curashi y forsa tambe ta bay na e mayornan cu tin cu habri hala y laga nan yiunan bay. Esaki, Prome Minister a expresa ta un de e cosnan mas dificil cu un mayor lo mester haci pero esaki ta na bienestar di nan yiunan. Mester laga nan



bay y confia cu e fundeshi cu cada mayor a duna nan yiunan ta suficiente pa nan ta exitoso den bida.

“Pabien na tur esnan cu tawatin un aña escolar exitoso, boso a muestra cu trabou duro tin su beneficio y fruto. Forsa na esnan cu tin cu ripiti e aña, cu positivismo y trabou duro boso lo logra e siguiente aña escolar, 2024/2025. Hopi exito y forsa na esnan cu ta bay studia den exterior y na e docente- y maestronan, danki pa e pasion cu boso tin pa boso trabou, ohala boso por descansa y gosa di un dushi vakantie. Cu Dios bendiciona boso tur”, Prome Minister a expresa. ■■■

Prome Minister Evelyn Wever-Croes:

TA LAMENTA CU POLITICONAN DI AVP TA SIGUI ATACA MINISTERIO PUBLICO

MINISTERIO PUBLICO TA UN INSTITUTO

IMPORTANTE PA ARUBA Y TA TOTALMENTE

INDEPENDIENTE



Den e ultimo dianan a constata varios atake severo contra di institutonan importante den nos comunidad, manera Ministerio Publico (OM), door di politiconan di AVP. Prome Minister Evelyn Wever-Croes ta considera esaki no aceptabel den comunidad di Aruba unda cu tin norma, balor y reglanan di decencia. Ministerio Publico ta un instituto hopi importante pa nos pais y nan ta traha totalmente independiente. No tin influencia politico den nan.

Aruba su institutonan independiente no mester wordo ataca ni lastra. Politiconan mester debati cu otro politico y no contra e institutonan aki. Ta importante pa sa cu si cualkier persona ta pensa cu un persona ta corrupto, e por bay Ministerio Publico cu prueba di esaki y nan ta atend'e.

E situacion mas recien a tuma luga despues di e veredicto di Corte di Husticia den cual a aumenta e castigo di Parlamentario, ex minister y candidato di AVP Benny Sevinger, di 1 pa 4 aña. Hopi hende a ataca Ministerio Publico y Corte di Husticia y yama nan marioneta di Gobierno. Prome Minister ta lamenta esaki pasobra hustamente e personanan cu uza e expresionnan aki sa cu no ta asina.

Ministerio Publico ta independiente den su trabou. E no ta duna cuenta na Gobierno y tampoco consulta cu Gobierno

ki investigacion nan ta haci of ken nan ta detene. Ministerio Publico como un instituto importante pa Aruba como parti di Reino, tin hopi bista riba funcionamiento di e instituto y Gobierno. Pa garantis cu Ministerio Publico por haci su trabou independiente. Ademá nan tin un ekipo profesional y un Procurador General nobo cu ta inspira confiansa na tur hende. Pues, no mester tin duda den e instituto den cualkier investigacion.

“Si uza un otro escenario, con por splica e situacion cu durante di gobernacion di AVP, a detene un Minister di AVP. A caso e tempo ey si Ministerio Publico tabata independiente y awo no? P’esey ta importante especialmente pa e lider di AVP Mike Eman y e ex minister di husticia y candidato di AVP Arthur Dowers, pa keda consecuente y serio riba e temanan aki, Prome Minister ta agrega.

Por ultimo, ta pidi politiconan y algun miembro di prensa cu ta haci mal uzo di e situacionnan aki pa ta sensato y uza e sentido di responsabilidad pa yuda hiba Aruba padilanti. Politiconan y miembronan di prensa sa cu Ministerio Publico ta independiente y por acerca nan pa pregunta. Pero no para na banda instiga y of ataca”, Prome Minister Wever-Croes a termina bisando.



MINISTER GEOFFREY WEVER A REUNI CU KAMER VAN KOOPHANDEL



Diahuebs ultimo Minister Geoffrey Wever a reuni cu Presidente di Camera di Comercio Sr. Kemmerling y Director di Camera di Comercio Sr. Balkenstein riba diferente tema relevante pa economia y cu merece atencion.

Cada seis (6) siman Camera di Comercio ta reuni cu Minister di Economia Minister Geoffrey Wever pa discuti strategia riba diferente topico relaciona cu economia di Aruba y haci palabracion nan concreto pa ejecuta esaki nan. A discuti y debati riba diferente topiconan durante di e reunion di e siman aki manera entre otro e resultado di trade mision pa Suriname cu Minister di Asuntonan Economico a organisa hunto cu Camera di Comercio y ATIA, a elabora riba e problemanan laboral riba mercado y e falta di personal adecua pa yena e bashi nan aki. A debati tocante e cobranza pa haci uso di e portal digital di Camera di Comercio.

Durante e reunion a toca e tema tambe di e contract entre WEB Aruba N.V. y e posicion di cremionan comercial. Minister Wever a duna Sr. Kemmerling y Sr. Balkenstein un update di e

plannan pa revitaliza San Nicolas y Oranjestad y con e proceso aki ta bayendo. Banda di esaki Minister Wever a elabora riba e estudio cu Minister Wever a laga haci riba e structura macro economico di Aruba su economia dor di Professor Hoesein hunto cu Hulanda

Minister Wever a elabora tamb riba e ayudo cu Aruba ta bai ricibi di United Nations pa desaroyo e FINTECH sector na Aruba y proceso pa certifica Oranjestad como un Capital Culinario. Pa finalisa e reunion Minister Wever a discuti riba posibel participacion di Aruba na un trade mision pa Panama y con por saca lo maximo di esaki manera cu a haci cu e trade mision nan anterior

“Mi ta considera Camera di Comercio un partner valioso di nos Ministerio y nan input, consehonan y preocupacionnan semper ta wordo tuma den consideracion. Un economia no por florece si no ta pa e forza di sector priva y pa e motivo aki dialogo continuo cu sector priva ta sumamente importante”, segun Minister Geoffrey Wever. ■



BIBLIOTECA NACIONAL ARUBA A PARTICIPA DEN E CONFERENCIA DI ACURIL NA GEORGETOWN, GUYANA



Durante e conferencia di ACURIL Aruba tabata tin diferente presentacion. Director di Biblioteca Nacional Aruba hunto cu Sra. Zetsia Ponson, encarga cu departamento di Arubiana a presenta Seventy-Five years of Library Work in Aruba:

An Essential Service 1949-2024. Sr. Ronny Alders di BNA a presenta den cuadro di nos XI Sustainable Education Symposium e topico Let's Plant.

Sr. Peter Scholing y director di Archivo Nacional Aruba Sr. Raymond Hernandez a presenta e tayer Linking the Dutch Caribbean Caribbean Slavery Registers...and beyond? Durante e Closing Banquet a reconoce Sr. Peter Scholing cu e Award di Caribbean Information Professional of the Year. Minister Endy Croes ta felicita e team di Biblioteca Nacional Aruba cu nan tremendo presentacion durante e Conferencia di ACURIL na Georgetown, Guyana. ■■■

MINISTER ENDY CROES A ACUDI NA OPEN DAG DI CENTRO PASTORAL ARUBA Y CENTRO HUBENIL ARUBA NA SANTA CRUZ



Recientemente, Minister di Enseñansa y Deporte Endy Croes cu su kerida esposa Sra. Dilailah Croes a acudi na e Open dag di Centro Pastoral Aruba y Centro Hubenil Aruba na Santa Cruz pa recauda fondo pa renoba centro y recauda fondo pa e grupo Pastoral Hubenil Aruba. Grupo Hubenil San Domingo de Guzman, gruponan di hoben Heart on Fire Savaneta, grupo Hesus y Maria Dakota y grupo Pastoral Hubenil di Noord tabata presente den e ocasion aki. E centro aki unda antes e surnan tabata biba, actualmente ta hogar di nos pastornan Catolico.

Ademas di esaki, Minister Endy Croes a haya un recorrido di Sra. Lila Richardson, unda por a conoce e centro mas di cerca. Ademas cu e centro aki ta conta cu un bunita kapel unda por haci oracion, tin diferente sala disponibel pa reunion y tayernan. Tabata un mainta ameno, unda tabatin diferente tent di cuminda crioyo, bebida, cos dushi y wega pa mucha. Na final Grupo di Betico a sorpresa tur presente cu nan tremendo musica. Minister Endy Croes ta gradici tur cu a contribui pa e bunita causa aki. ■■■■





Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD